

N Pian de politica linguistica senza n 15%

Al Consei del Comun general de Fascia, l'é stat aproà l Pian organich di intervenc de politica linguistica per l'an 2013, con manco finanziemenc da pèrt de la Provincia

Cultura - Aldò del lurier de la Consulta de la Cultura Ladina del Comun general de Fascia, olache l'é ite i raprezentanc de la sociazions culturèles e de la istituzions e i enc che te Fascia se cruzia de cultura e lengaz, enstadi i conseieres e i ombolc del Comun general de Fascia à aproà l Pian organich di intervenc de politica linguistica per l'an 2013. L'ombolt de Procura enciarià del setor de la cultura, Renzo Valentini, l'à spiegà che chest an l'é stat smendrà l contribut da pèrt de la Provincia de Trent, per n 15% de manco.

Delaite del Pian, te la pruma pèrt, se troa l'azions permanentes de valuta strategica olache l'é ite i intervenc per la politica linguistica ti setores de la stampa, de la radio e de la televijion e donca per La Usc di Ladins, per Radio Studio Record olache vegn manà fora desvalives programes per ladin desche N bel bondi ladin, Bela Ladinia, Che metone pa anché sora fech?, Mingol de dut e nia n dut!, Trentin Comunità ladin, Notizièr ladin, Fascianèdes, L codejel, Arianeves, La Usc di ladins, Stroz per la Ladinia. E dapò l'é ite ence i finanziemenc per la trasmiscions su la Televijion per la Mendranzes Linguistiches (TML), desche per ejempie Ercaboan.

Te chesta pruma pèrt l'é ite ence i corsc e i ejames per l zertament del lengaz e de la cultura ladina e ence i evenc culturai e identitères a didament de la mendranza desche l'Aisciuda Ladina, la Festa ta Mont e la Festa del Rengraziament.

Te la seconda pèrt del Pian l'é ite i projec de cooperazion con l'autra mendranzes e te la terza pèrt l'é i finanziemenc a sostegn de la ativitèdes de promoziun

linguistica desche chel a l'Union di Ladins per sia atività editorièla per ladin e autra doi scomenzadives: chela per i 80 egn de la Musega da Poza e n projet de teater portà dant da la Scola ladina de Fascia e che vegnarà manà fora ence sun TML.

La quarta e ùltima pèrt del Pian la tol ite l'ativitèdes culturèles e de delet olache troa lèrga duta la scomenzadives de la sociazions de folclor e di gropes culturèi te noscia val e che tegn sù la cultura e la tradizions de noscia mendranza ladina te Fascia.

L Pian l veit n cost total per l Comun general de Fascia de 467.099,05 euro corii dai set Comuns de Fascia per 103.932 euro, da la Provincia de Trent aldò de la L.P. 6/2008 per n total de 329.667 euro, da la Region Trentin Sudtirolo per 21.500 euro e ence dal Stat aldò de la L. 482/99 per 12 mile euro. (vr)



Renzo Valentini, l'ombolt de Procura del Comun general de Fascia, enciarià del setor de la cultura.